



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0026727 25
Sarajevo, 15.07.2025. godine

Na osnovu člana 35. stav 2. tačke e) i člana 216. stav 3. ZKP-a BiH, donosim:

N A R E D B U
o nesprovođenju istrage

Neće se provesti istraga po krivičnoj prijavi podnesenoj od strane „(...)“ zaprimljena sa email adrese ... sa prilogom 'screenshot' fotografije komentara između „(...)“ i S.T. objavljenih na članak portala ... sa naslovom ... zbog krivičnog djela Izazivanje nacionalne, rasne i vjerske mržnje, razdora i netrpeljivosti iz člana 145a. KZ BiH, jer ne postoje osnovi sumnje da je prijavljena osoba počinila navedeno krivično djelo.

O b r a z l o ž e n j e

Tužilaštvo Bosne i Hercegovine je dana 27.02.2025.godine zaprimilo akt Federalnog ministarstva unutrašnjih poslova – Federalna uprava policije Sarajevo broj: ... od ... 2025.godine, sa prilogom krivične prijave zaprimljene na službeni email adresu Federalne uprave policije od strane „(...)“ sa email adrese ... zbog komentara objavljenih na portalu ... između „(...)“ i S.T., zbog kako se navodi u prijavi poziva na pucanje i nezavisnost, te je prilikom pretrage na društvenoj mreži Facebook ... došlo do informacija da se prijavljeni komentari odnose na članak pod nazivom ..., a uz krivičnu prijavu je dostavljen i prilog 'screenshot' spornih komentara u kojem je sadržan komentar S.T.: „Bednici lojavi pogledajte svoje komentare a vi ste ga doveli sa nato paktom je.. vam on mater svima redom ko je vama od Srba bio dobar kad ste Plavšićku zvali četnikuša sad bi ja volio da ga što više osude i mi smo s vama završili za sva vremena ide nezavisnost i malo puškaranja koji 300 i 400 da prošaraju Sarajevo, Zenicu, Bihać itd.“

Postupajući po naredbi Tužilaštva BiH od 30.04.2025.godine, Državna agencija za istrage i zaštitu BiH je dostavila Izvještaj o realizaciji iste broj: ... koji se odnosi na provjere predmetne krivične prijave, te su tom prilikom u svojstvu svjedoka saslušani podnosilac krivične prijave „(...)“, kao i lice S.T., na okolnosti navedene u krivičnoj prijavi.

Svjedok S.T. u svojoj izjavi je naveo da je na portalu ... na članak sa naslovom ... postavio komentar kao odgovor na njemu upućene verbalne prijetnje od strane više ljudi te su mu slali i fotografije njegove djece, kao i da je bio iziritiran prethodnim komentarima a da je njegov Facebook profil ograničen i da nema mogućnost da postavlja nikakve objave na Facebooku sem da komentariše pojedine komentare koji su prethodni posjetioci postavili. Naveo je da u tom momentu nije mogao komentarisati članak pod navedenim naslovom zbog zabrane

koju ima od strane Facebooka iz njemu nepoznatih razloga ali da je mogao komentarisati objave pojedinaca na tekst, sto je iz revolta i učinio.

Iz izjave svjedoka „(...)“ proizilazi da je isti podnio krivičnu prijavu Federalnoj upravi policije Sarajevo putem email-a, zbog komentara na članak portala ... sa naslovom a koji je postavljen od lica koji ima Facebook profil pod imenom S.T., te u spornom komentaru S.T. je pozivao na ratne sukobe i prizivao na cijepanje države, odnosno udar na teritorijalni integritet BiH, pozivajući ponovo na rat u smislu da se ponovo krene, kako je naveo „puškaranjem“ da se „prošara Sarajevo, Zenica, Bihać itd“. U svom komentaru je uputio i psovke koje je svjedok shvatio da su upućene Bošnjačkom narodu, na šta je svjedok komentarisao da je Bosna i Hercegovina suverena država, da u nazivu iste nigdje ne stoji Srbija, te ga upitao zašto ponovo želi da ubija žene i djecu, i da će njegov komentar prijaviti nadležnim organima, nakon čega je putem email adrese prosljedio Federalnoj upravi policije krivičnu prijavu sa 'screenshot' fotografijama spornog komentara.

Na osnovu gore izloženog proizilazi sljedeće: Krivično djelo Izazivanje nacionalne, rasne i vjerske mržnje, razdora i netrpeljivosti iz člana 145a. stav (1) čini onaj „*Ko javno izaziva ili raspiruje nacionalnu, rasnu ili vjersku mržnju, razdor ili netrpeljivost među konstitutivnim narodima i ostalima, kao i drugima koji žive ili borave u Bosni i Hercegovini kaznit će se ...*“.

Iz same dispozicije ovog krivičnog djela se vidi da se prije svega štiti ustavni poredak, država i njeno unutrašnje harmonično funkcionisanje, zajednički život i tolerancija između konstitutivnih naroda i ostalih koji žive na terotiji BiH, a putem zaštite prava na dostojanstvo i putem zaštite ugleda i prava s obzirom na identitet pripadnika konstitutivnih naroda, pojedinca i ostalih koji žive i borave u BiH. Nadalje, iz citirane zakonske odredbe vidljiv je elemenat javnosti, odnosno činjenica da je za postojanje krivičnog djela potrebno da je učinjeno u javnoj sferi, kao i da se radnjom ovog krivičnog djela može smatrati samo ona radnja koja je pogodna da izazove ili rasplamsa mržnju, razdor ili netrpeljivost, odnosno potrebno je da preduzeta radnja koja je objektivno pogodna da prouzrokuje ili intenzivira nacionalnu, rasnu ili vjersku mržnju. Da li određena radnja ima takav kapacitet procjenjuje se s obzirom na njenu sadržinu i značaj, kao i sredinu u kontekstu u kojem je preduzeta, kao i svojstvo počinioca.

Naime izjava S.T. nema elemnata pozivanja, niti rasprivanja na nacionalnu, rasnu ili vjersku mržnju, razdor i netrpeljivost, nego davanje javnog mišljenja o političkim zbivanjima u BiH, i ista objava od različitog broja lica ne postiže dovoljan nivo javnosti koji bi bio objektivno moguć da prouzrokuje i rasplamsa nacionalnu, rasnu i vjersku mržnju i netrpeljivost, jer objave na portalima ukazuju na lični i ograničen stav pojedinca na društvenim mrežama, a isto posjećuju lica koja žele, te se ne mogu smatrati javnosti u širem smislu, pa je s toga donesena odluka kao u dispozitivu naredbe.

Tužilaštvo će, u smislu čl. 216. stav 4. ZKP BiH, u roku od tri dana od dana donošenja odluke obavijestiti podnosioca prijave koji ima pravo podnijeti pritužbu u roku od osam dana od dana prijema obavijesti, uredu Tužioca.

TUŽILAC
TUŽILAŠTVA/TUŽITELJSTVA BiH